



2021-imut aningaasanut inatsisissasut siunnersuut.

(Aningaasaqarnermut Naalakkersuisoq)

(Siullermeerneqarnera)

COVID-19 oqaluuserisorujussuarput. Nappaat maani Nunatsinni nunanut allanut sanilliullugu pitsaanerujussuarmik maannakkumut akiorsinnaasimasarput. Tamanna tulluusimaarutigissavarput. Tassungali ilutigalugu nassuerutigisariaqarparput, COVID-19 tamanna attorneqaatigigatsigu. Annertoorujussuarmimmi attorneqaatigivarput. Nunanit allanit takornariaqanngingajalluinnarpugut. Nunarsuarmi aalisakkanut akit appariartorput. Aalisakkat qerisut piumaneqarnerat annertungaartumik appariarsimavoq. Nunatsinnut angalasut killileersornerata kinguneraa sanaartugassat arlallit kinguaattoornerat. Allarpassuarnillu taaguisinnaagaluarpunga.

Imaassinnaavoq, uagut innuttaasut nunatta karsianut isertitat apparnerat maannakkorpiaq malugisinnaanngikkippat, Naalakkersuisullu sipaarutaat ilaatigut naleqqutinngitsutut isiginarsinnaagaluarput, kisiannili tamanna piviusuuvoq, tamannalu allanngortissinnaanngilarput. Tamanna tungavilagulu paasiuminaassinnaavoq, kisiannili isigisariaqarluni immikkuullarissumik inissisimanitta kingunerigaa.

Tamaat isigalugu isumaqarpoq, inuiaqatigiinni aningaasaqarniarput annertuumik sunnerneqartussanngortoq. Tamannalu aamma 2021-mut aningaasanut inatsisissatut siunnersuut atuarnarani paasineqassasoq. Siunnersuut, pissusissamisunngitsoq, nunatta aningaasaqarniarnera ukiut sisamat ingerlanerani oqimaaqatigiittuaanartussaagaluamut naleqqutinngitsoq. Tamanna uagut Demokraatiniit iluarinngilarput. Akuerisinnaakutsoorparput, ukiup ataatsip ingerlanerani annertuumik amigartooruteqartoqarpat, kisiannili uagut isumaqarpugut, pinngitsoorani pilersaarummik takutitsisoqarsinnaasoq, ukiut sisamat ingerlaneranni oqimaaqatigiittoqarsinnaasoq. Suliaq oqimaassaqaq, sakkortuunillu aaliangernernik pingaarnersiuinernillu pisariaqartitsissalluni, toqqagassammi aappaata kingunerisussaavaa akiligassap meerartatsinnut ingerlateqqinneqarnera, tamannalu pissusilunnerussaaq.

Taamaattumik uagut politikkerit ingasaassinaveersaartariaqarpugut tunuarsimaarlutalu. Iliusererusutagut kusanartut tamaasa akissaqartissinnaanngilagu. Nuanninngilaq, oqimaaqatigiinnissaali pisariaqarluni, aningaasaqarniarneq qularnaarniarlugu, kinguaariillu tulliuuttut, atuivallaarnitsinnik akiliisinnginnissaat anguniarneqassalluni.

Qujanartumilli ajunngitsumik ingerlasimavugut, pisortani isertitat atuinitsinut sanilliullugit oqimaaqatigiipajaartarsimallutik. Tamannali allanngorluinnarpoq kikkut tamarmik ilimagisaat akimorlugu allanngorluinnarmat COVID-19 tassani pissutaalluni. Tamanna ajutoornermik nalaanneqarnertut ippoq, sillimaffigisariaqagarput 2021-miinnaanngitsoq, ukiunili tulliuuttuni aamma. Soorlu Aningaasaqarnermut ataatsimiititaliami suleqatiga oqartartoq "ilaannikkut piittuusaarluni peqqinnarpoq, taamaaliornikkut



koruunit atugassat ataasiakkaarlugit eqqarsaatigissagatsigit, tamannami pisariaqarneq ajormat aningaasaaterpassuaqarnerup nalaani, pisarnitsitullu inuugutta”.

Taamaattumik aningaasanut inatsisissamut isumaqatiginninniarnermi annertunerusumik ukiut sisamat ingerlaneranni Aningaasanut inatsisip oqimaqatigiinnissaa pisariaqarpoq. Tassunga atatillugu soorunami eqqumaffigineqassaaq, assigiinngissuteqarmat, aningaasat qanoq atornissaat. Ingerlatsinermut aningaasartuutissaava, naassaangitsumik aningaasalersugassaq? Aningaasaliissutaava, siunissami imminut akilertussaq? Ataasiartumik aningaasaliissutaava, ukiumut aaliangersimasumuinnaq sunniisussaq?

Pingaaruteqartorujussuuvoq taakkua immikkoortinnissaat, pitsaasumik oqallisissagaanni. Assersuusiulaarlanga. Illuatungiliuttuni partiit ilaasa nuannarisorujussuuat oqaluttuarissallugu, qanoq annertutigisumik sipaarsinnaasugut mittarfissat Nuummi, Ilulissani Qaqortumilu unitsikkutsigit. Taakku partiit isumaqarput, aningaasarpassuarnik sipaassasugut, unitsivissorutsigit, Tassunga Demokraatit isumaqataangillat. Mittarfinnut nutaassanut aningaasaliissutit siunissamut ungasinnerusumut aningaasaliissutaapput, taamanikkussamut iluanaarutaalluurtussat. Aningaasaliinngitsoornerummi kingunerissavaa, Nunatut piitsuunerulissasugut. Tamannalu pisariaqartingilarput.

Assersuutigalugu isornartorsiorneqarsimavunga oqarsimasunga, uagut Demokraatini piareersimasugut Qaqortumi 1.500 meterimik mittarfiliortitsinissamut piareersimasugut. Uani oqaaseqarnera tungavilersorniarsarissavara; Kujataa ukiorpassuarni puigugaasimavoq, ineriartuutaasussanik maani Inatsisartuni iliuuseqaraangatta.

Qujanartumik kiisami Kujataani aatsitassarsiornermi piiaanissamut akuersisummik tunisisoqarpoq, neriuppugullu, amerlanernik saqqummertoqarumaartoq. Aatsitassarsiorneq sulisussanik annertuumik qammaasussaavoq, pisariaqarporlu, inuiaqatigiinni nuttarnelertoqarnissaa. Inuussutissarsiortut aamma Kommune Kujalleq pilersaarusiorsimapput naatsorsuutigalugu, mittarfeqalernissaa. Tassangaannartumik mittarfissaq unitsinneqaraluarput, aningaasatigut kinguneqapiloratarsinnaavoq, unitsitsiinnarnerup kingunerissammagu, aningaasartuutit annertusineri mittarfiup sanangittoorneratigut.

Mittarfik naannerussappat, mittarfimmi pilersaarummik nutaamik sanasoqassaaq, sivirusumik suliarineqartussamik, pilissuarpullu qinigaaffik naariikatattoq, sulilu aaliangertoqarani.

Uagut Demokraatiniit ersiginngilarput aaliangikkatta attannissaat, tamannalu Kujataarmiut ilisimasariaqarpaat. Aningaasartuutaanerusussaq ataasiaannartumik aningaasartuutaasussaavoq. Mittarfissaq suliarineqassangippat, aningaasartuut tamakkiisoq qaffasinnerujussuussaaq.

Illuatungiliuttuni partiit ilaqarput, isumaqartunik, sulinermut ilanngaat piviusunngortittariaqanngitsoq imalunniit suliffeqarfiit akileraarutaat appartittariaqanngitsut. Tamanna piffissami sivikitsuinnarmi amerlanernik isertitsissutaassaaq. Immikkut isigissagaanni ilumoorpoq, kisiannili soorlu assersuutigalugit mittarfissat, siunissami imminut akilersinnaangilaq. Suliffeqarfiutigut nukillaarsarneqassapput, suliffissat pilersinneqanngitsuussapput, ilaqutariillu sulisartut aningaasaatikinnerussapput. Tamanna kissaatigaarput? Tamanna Demokraatit kissaatiginnigilluinnarpaat.

Demokraatit tulluusimaarutigaat inuiaqatigiinnut suleruluttunut suliffeqarfinnik piujuartitsinissartik, suliffiinillu ikiorsiissutit aqutugalugit ikiorsiinissartik erloqinartup Coronap nalaani. Suliffeqarfiit



arlaannaataluunniit missigersuumminni tassunga inissinnissartik naatsorsuutigisimajunnangimmassuk. Nunatta karsianut akeqanngitsuusimangilaq, uteqqilluguli, nunatta suliffeqarfiinut aningaasaliissutaavoq. Aningaasaliissut allarpassuurtuulli akilertariaqagarput, kingunipilugisinnaasaanut akiligassinneqassanngikkutta.

Taamaattumik allatut iliuuseqartariaqarpugut. Isiginiartariaqarparput inuiaqatigiit qanoq ilusilersorneqarsimanersut, isiginiarlugulu, arlaatigut naleqqutinngitsunik iliuuseqarsimanersugut aammalu sumi aningaasanik atuivallaarnersugut.

Nalilersueqqissaartariaqarpugut. Pisortat aaqqissuunneqarnera taama angitigitittariaqarparput? Pisariaqarpa inuussutissarsiutinut tapiissutinik taama annertutigisunik tunioraaginnarnissarput? Pisariaqarpa suliniaqatigiiffinnut soorlu ICC-tut ittunut aningaasatigut tapiissuteqartuarnissaq? Tassa tamakku eqqumaffigisassagut aningaasanut inatsisissamut siunnersuummut isumaqatigiinniarnitsinni.

Uagut politikkerit oqimaatsunik aaliangiisariaqarpugut, nunarput COVID-19-miit qaangiilluartissagutsigu, nunarsuarmilu kingunipiluutaasunit qaangiilluartissagutsigu. Kinguaassagut tulliuuttut pillugit. Tamanna tamatta aallaavittut eqqarsartariaatsitullu atortariaqagarput, aningaasanut inatsisissatut siunnersuutip isumaqatiginninniutigineqalernerani eqqaamasassarput.

Tassunga atatillugu eqqaamassavarput, Aningaasaqarnermut siunnersuisoqatigiinni aningaasaqarnermut ilisimasallit ukiaaneranani nalunaarusiaat saqqummeqqammermat. Inerniliussat ersarissut ilaat, naatsumik taarusutakka isummersorfigerusutakkalu:

Siullermik – isumalluarnarnerpaartaa – unaavoq, Nunatta aningaasaqarnera ilimagisamit pitsaaneruseqarnermut inerneqarmat. Taamaattumik naatsorsuutigineqanngilaq, 2020 toqqaannartumik amigartooruteqarnissaq. Taassuma Demokraatit eqqarsaataat taperserpaat, pisariaqartariaqartoq aningaasaqarnermut inatsimmik siunnersuuteqarsinnaanissaq, ukiut sisamat isigigaanni oqimaqatigiisumik.

Aningaasaqarnermut siunnersuisoqatigiit oqaatigaattaaq, suliffissaaleqisut qaffakkaluartut, suli appasimmata. Susassaqarfinni arlalinni piginnaasaqarluartunik ilinniarsimasunillu amigaateqarpugut, taamaattumillu suli pisariaqartitsivugut ilinniarnersup pitsanngorsarnissaanik ukkatarinninnissamut, nuttarsinnaanersup annertusinissaanut suliffeqarlunilu aningaasatigut iluanaarutaalluarnissaaneranik kajumissuseqarnerunissaq anguniartariaqaripput. Taamaattumik pingaaruteqartorujussuuvoq, sulinermit ilanngaatiq qatangiinnartinninnissaa soorlu partiit arlallit siunnersuutigigaat. Taakkulu saniatigut immikkut ittumik suliniuteqarariaqarpugut qularnaarniarlugu, sulisinnaasut tamarmik, sulinissaat. Killeqartariaqarpoq angerlarsimaannarluni pisortat ikiorsiissutaannik tigooqqaanissaq inuiaqatigiinnut suleqataanguarnani.

Sulisussanik piginnaasaqarluartunik ilinniarsimasunillu amigaateqarneq eqqartortillugu, allanik aamma eqqartugassaqarpugut. Tassalu kalaallinik ilinniartunik ilinniagaqareernerminni sulisussanik amigaateqaratta. Taakku Nunatsinni imaluunniit nunani allani ilinniarsimagaluarpataluunniit. Taakku nukiupput, pissarsiarissallugit iliuuseqarfiginngippallaakkagut. Uagut Demokraatiit aningaasaliiffiginissaannut piareersimavugut – taamaaliunnginnissatsinnut akissaqanngilagut.

Naggataatigut taarusuppara, Aningaasaqarnermut siunnersuisoqatigiit tikkuarmassuk, pisariaqartoq, pisortat allaffeqarfiata eqaallisarneqarnissaa. Naalakkersuisut aallartisakannerput, kisiannili



angusaqarluarniartariaqarpugut tunaartaqarnerullutalu, tamannalu naatsumik oqaaseqartartutut saqqummiininni eqqaatsiareerpara.

Demokraatit erseqqissassavaat, sulinissatsinnut piareersimagatta ilungeersorlutalu tunngavileerusulluta, ataatsimoorluta maani Inatsisartuni Aningaasaqarnermut Inatsimmik sananissarput, ukiut sisamat ingerlaneranni oqimaatigiissumik. Pisussaaffittut isigarput kinguaariinnut tulliuttusanut.

Aaliangiisariaqartussaavugut iluarineqanngittunik. Tamanna nalunngilarput. Tuppallersaatigitiguli kisimiinnginnatta taamatut inissittusaaq. Nunarsuaq tamakkerlugu aningaasaqarneq ilungersunartorsiorpoq privaatini pisorta qarfinnilu. Nuannaarutigisariaqarparput, nunanut allanut sanilliulluta eqqorneqarnerput annertunerunngimmat qallunaat naalagaaffiannit bloktilskuddimik pisarnermut pisuulluni. Bloktilskuddi isumaqanngilaq, sipaareernitsinniit sipaarutissanik ujarlissanngitsugut. Imannalli oqanngilanga, eqqissisimaassasugut. Sullisigut atisariaqarpagut – pisariqarluinnarpoq.

Taamaattumik aningaasaqarnermut inatsisissatut siunnersuutip isumaqatiginninniutigineqarnissanut qilanaarpugut, piareersimavugut!

Taamatut oqaaseqarlunga inersuarimi pitsaasumik oqallinnissarput qilanaaraara. Qularutiginnigilluinnarpara, isumaqatiginninniarnissanut tamanna tunniussassaqaqtugut, takutigu naapeqatigiissinnaanerluta ataatsimoorlutalu nunatut aninaasaqarnikkut ilungersunartorsiornerput qaangerniarsaritigu, nunarsuarimi nualluussuup pilersitaanik ilungersortitsisoq peqqinnissatsinnuinnaanngitsoq aammali aningaasaqarniarnitsinnut.

Siunnersuut Aningaasaqarnermut ataatsimiititaliamut sukumiisumik suliassanngorlugu innersuussutigineqarpoq.